



Oktober 2, 2018
Kaujisautiugialik taffainak

AngajukKâk ugguagutiKajuk ajulisimanninganik pimmagituk inutuKak

Pilluni Nunatsiavut kavamanganit Ilaliugutilinnilu Labradorimi Inuit Nunamik Satusainnimut AngiKatigegutinganit, AngajukKâk Johannes Lampe ullumi Kaujititsijuk ugguagutiKatsiamaginniminik ilanginnut ilannânginnulu pimmagittosimajumik Nainimi Inuk inutuKammik Julius Merkuratsumik, ajulisimatillugu Montâgimi.

“Juliusi angijummagimmik ikajutsuasimajuk nunaliujuni Nainimi, inunnik Labradorimi, Nunatsiavuttinillu ilonnagut,” uKajuk AngajukKâk Lampe. “Inojop inosinga isumagijausok inoninginni attuisimaningitigut ikKaumautaujutigullu, kitsaningitalu Kimattaujuut. Ullumi ugguatlappugut angijullagimmik Kimataunnivut, tavatuak nalliunisiugumammijugut inosiKatsiasimanninga. Juliusi kingomajautsualâttuk, inosigisimajangit atujaulâpput unuttunut kinguvânginnut.”

Merkuratsuk nosimajuvinik Nainimut Nutâmit nukappiangutluni. Akuninit aiviuKattasimalauttuk ikajuttaugumajunut ilukKusinik Kaujimanniminut unuttunik nunamegiamut omajunnilu pitjutiujunik. Akuni katimattiusimalauttuk Labrador Inuit katutjiKatigenninganut, satusaijiuKatausimammitluni, katimajiutlunilu Nainimi, taggânilu Nainimit, nunanik kamanninginni, ajuKittuijuatsoKattasimamitlunilu Moraviat katimmavingani.

Unikkausiligijinut Kaujisapviusok:

Bert Pomeroy
Aulatsijik Kaujimatitsisianitsaunimmut
(709) 896-8582